

Kingusinnerpaamik UPA12-mi suliariumannittussarsiuussinermi misissuinermik saqqummiussinissamut Naalakkersuisut peqquneqarnissaannik Inatsisartut aalajangiiffigisassaattut siunnersuut, paasiniallugu suliariumannittussarsiuussinerni aningaasatigut allaffissornikkullu sipaartoqarsinnaanersoq, suliani ullumikkut Namminersorlutik Oqartussanit aamma Namminersorlutik Oqartussat suliffiutaannit ingerlanneqartartuni. Misissuinermi aamma siunertaassaaq suliat pisortanit ingerlanneqartartut sorliit namminersortunut imissutigineqartarsinnaanersut nassuiarnissaat tikkuarnissaallu aamma sipaarutaasinnaasut taggillugit taamaasilluni suliat ukiup tullianut aningaasanut inatsisissamut ilanngunneqarsinnaalersillugu.

(Inatsisartunut ilaasortaq Niels Thomsen, Demokraatit)

Inuussutissarsiornermut Ataatsimiititaliap

ISUMALIUTISSIISSUTAA

Siunnersuutip aappassaaneerpeqarnerani saqqummiunneqartoq

Inuussutissarsiornermut Ataatsimiititaliaq suliarininnermini ukuninnga ilaasorta qarpoq:

Inatsisartunut ilaasortaq Naaja Nathanielsen, Inuit Ataqtigiit, siulittaasoq

Inatsisartunut ilaasortaq Niels Thomsen, Demokraatit, siulittaasup tullia

Inatsisartunut ilaasortaq Kim Kielsen, Siumut

Inatsisartunut ilaasortaq Akitsinnguaq Olsen, Siumut

Inatsisartunut ilaasortaq Karl Lyberth, Siumut

Inatsisartunut ilaasortaq Aqqaluaq B. Egede, Inuit Ataqtigiit

Inatsisartunut ilaasortaq Knud Fleischer, Kattusseqtigiit Partiiat

Siunnersuutip UPA2011-mi siullermeerpeqarnerata kingorna siunnersuut Ataatsimiititaliap misissorpaa, matumuunalu Inatsisartunut suliassanngortillugit isummani saqqummiullugit.

1. Siunnersuutip imarisaa siunertaalu

Suliassat kiffaartuussinerillu Namminersorlutik Oqartussanit suliffeqarfinnillu Namminersorlutik Oqartussanit pigineqartunit ullumikkut ingerlanneqartut namminersortunut suliassanngortinneqarneranni allaffissornikkut aningaasatigullu iluaqutaasinnaasut ugartorniarlugit paasiniarniarlugillu misissuinissamik Naalackersuisut peqquneqarnissaat siunnersuuteqartup kissaatigaa. Pisortat suliassaataasa suliariumannittussarsiuunneqartarneranni pisortanut innutaasunullu aningaasaqarnikkut sullissinikkullu iluaqutaasinnaasut nalilersuinermi aamma ugartorneqarnissaat siunnersuuteqartup taamatuttaaq kissaatigaa.

2. Siunnersuutip Inatsisartuni suliarineqarnera

Siunnersuutip siullermeerneqarnerani partiinit Naalackersuisunillu ataatsimut isigalugu tapersorneqartoq ataatsimiititaliap paasivaa.

3. Ataatsimiititaliap isumaliutersuutai

Pisortat, aalajangiiffigisassatut siunnersuummi Namminersorlutik Oqartussatut ingerlatseqatigiiffittullu Namminersorlutik Oqartussanit pigineqartutut paasillugit, Kalaallit Nunaanni aningaasaqarniarnermut ataatsimut isigalugu qanoq pingaaruteqartiginerannik tunngaviusumik ajornartorsiut siunnersuuteqartup aalajangiiffigisassatut siunnersuummini tikkuarpaa. Inuiaqatigiit aningaasaqarniarneranni pisortat inissisimanerannik oqallinneq Kalaallit Nunaanni nutaajunngilaq.

Nalunaarusiami Siunissamat Takorluugaq: Isummernissamat tunngavissiami Aaqqissuussaanermi Politikkimi Iliuusissanut Pilersaarut september 2000-meersumi Namminersornerullutik Oqartussat suliffeqarfiutaasa inuiaqatigiit aningaasaqarniarneranni pingaarnertut inissisimaannassanersut taamanikkut Naalackersuisuusut ilaatigut oqallisisigisassanngortippaat.¹ Kalaallit Nunaanni aningaasaqarniarnermi pisortat ingerlatseqatigiiffiisa pingaaruteqarnerat annikillisinniarlugu iliuusissanik aallartinneqartussanik politikikkut aaqqissuussaanermi iliuusissatut pileraarummi inassuteqaateqartoqarpoq. Namminersortunngorsaanikkut tamanna ilaatigut pissaaq, tamannalu taamanikkut Inatsisartuusuni taperserneqanngilaq.

Namminersorneq pillugu ataatsimiititaliarsuup isumaliutissiissutaani 2003-meersumi sammisaq aamma eqgartorneqarpoq, tassani Kalaallit Nunaanni inuussutissarsiornermi Namminersornerullutik Oqartussat suliffeqarfiutaasa pingaarnertut inissisimani

¹ Isummernissamat tunngavissiami Aaqqissuussaanermi Politikkimi Iliuusissatut Pilersaarummi september 2000-meersumi qup. 9 aamma qup 17

Namminersorneq pillugu ataatsimiititaliarsuup apeqquuserpaa, tamannalu siunnersuuteqartup aalajangiiffigisassatut siunnersuummini tunngavilersuummini innersuussutigaa atorlugulu. Oqartoqarsinnaavoq immikkoortuni assigiinngitsuni suliassat assigiinngitsut siumut suliariumannittussarsiuuteqqaarnagit aktieselskabinit pisortat pigisaannit ingerlanneqartarnerisigut pisortat annertunerusumik ingerlatsisarnerat sakkortusisinneqartoq. Pineqartumi Kalaallit Nunaat EU-p peqqussutaani ilaanngimmat nioqqutinik sullississutinillu tamanut suleriesmannittussarsiuussisoqartarnissaa pillugu ataatsimiititaliap ilisimasaa malillugu inatsiseqanngilaq². Pisortat aningaasalersugaannik sanaartornermi sanaartugassanik tamanut suliariumannittussarsiuussisarnermi sinaakkutinik qulakkeerinnitsitsisunik Kalaallit Nunaat inatsisigut atuutilersitsinikuuvoq. Namminersortut nioqqutinik sullissinernillu ingerlatsinerulersinnaanerisa maannakkut akimmiffeqarnera ilaatigut tamassuminnga aamma tunngaveqarsorinarpoq.

Pisortat suliassaataannik suliariumannittussarsiuussisinnanarni unammillissutaasinnaasunilu Kalaallit Nunaannut tunngatillugu eqqarsaatigilluagassat pissutsinit qulaani taaneqartunit allaanerisut soorunami aamma atuupput. Nunatsinni pissutsit immikkut ittut, nunap pissusaa, nunassittarnerit il.il. misissuinnermut atatillugu ilanngunneqartariaqartut allaaserissallugit annertuallaassaaq. Paasiniaanissami sinaakkutinut tunngaviusumik piumasaaqatinik Naalakkersuisut ilanngussinissaat Ataatsimiititaliap ilimagaa. Nunap immikkoortuini ineriartortitsinnermut pilersaarut aammalu Namminersorlutik Oqartussat aktieselskabiutai pillugit ingerlatseqatigiiffinnik politikkipillugit tunngavigalugit Naalakkersuisut ajornartorsiummik nalilersuissamaarput. Pissutsit naleqquttut aammalu ilisimasat assigiinngiiaartut tunngavigalugit misissuinissamik Naalakkersuisut kissaateqarnerat pitsaasutut Ataatsimiititaliap isigaa.

4. Siunnersuutip aningaasatigut kingunissai

Inatsisartut suleriaasianni § 33, imm. 1-imi takuneqarsinnaavoq aalajangiiffigisassatut siunnersuutip piviusunngortinnerani aningaasatigut allaffissornikkullu kinguneqaatissai siunnersuutip tunngavilersornerani allaaserineqassasut. Siunnersuutip piviusunngortinnerani aningaasatigut kinguneqaatissai tamanna malillugu allaaserineqarsimanerat Ataatsimiititaliap malugaa. Tamanna pillugu Ataatsimiititaliaq oqaaseqaatissaqanngilaq.

² Paasissutissat annertunerisut uani takuneqarsinnaapput: <http://www.udbudsportalen.dk/Ret-og-regler/Direktiver-love-og-regler/Udbudsregler/> aamma <http://www.konkurrencestyrelsen.dk/?id=14575>

5. Ataatsimiititaliap inassuteqaataa

Ataatsimiititaliami amerlanerussuteqartut, Demokraatit, Siumup aamma Kattusseqatigiit Partiiata ilaasortaataaasa siunnersuut akuersissutigineqassasoq inassutigaat.

Ataatsimiititaliami ikinnerussuteqartut, Inuit Ataqtigiit ilaasortaataaasa siunnersuut akuersissutigineqassasoq aamma inassutigaat, siunnersuulli pillugu ima oqaaseqarumallutik.

Suliassat suut piffissap ungasinngitsup ingerlanerani allanut suliassanngortinneqarsinnaanerannik namminersortunngorsarneqarsinnaanerannilluunniit pingaarnertut naliliisumik misissuinissap iluaqutaanissaanik siunnersuuteqartup oqarnera Inuit Ataqtigiit isumaqtigaaat, tamannalu tunngavigalugu siunnersuutip siunertaa taperserparput. Qulequttalli taasissutigisassap oqaasertaa malissagaanni suliassani hundredilikkaanik amerlassusillinni ullumikkut pisortanit isumagineqartartuni tamarmiusuni sipaarutaasinnaasut misissuinikkut aningaasartaliiffigineqassapput. Taamaattumillu immikkoortup Inatsisartuni oqaluuserineqarnerani isumakuluutit partiimit saqqummiunneqartut Inuit Ataqtigiinnit uteqqikkumaneqarput. Suliassat qitiusut pisortanit suli isumagineqartariaqartutut, taamaattumillu misissuinermi aallaqqaataaniilli ilaatinneqartariaqanngitsutut Inuit Ataqtigiinnit isigineqarput. Assersuutigalugu ilinniartitaanermut, isumaginninnermut aammalu peqqinnissaqarfimmuut tunngasuni suliassat amerlanersaat misissuinermi taamaattumi ilaatinneqartariaqanngitsut isumaqarpugut. Tamatumani assersuutigalugu pineqarpoq atuarfimmik ilinniarfiillu sinnerinik ingerlatsineq. Tamatuma saniatigut peqqinnissaqarfimmi suliassat ilaat annertuut pisortat qitiusumik sullississutaattut isigivagut. Tamatumani ilaatigut pineqarput napparsimasunik passussineq nunattalu nakorsaataasivia. Peqqinnissaqarfimmi suliassat killilikkat misissuinermi taamaattumi ilaatinneqarsinnaanerant ammaffigaarput. Tamatumani assersuutigalugu pineqarsinnaapput eqqiaaneq, errorsisarneq assigisaallu. Tamatuma saniatigut pilersuinermik suliassat misissuinermi ilaatinneqartariaqanngitsutut Inuit Ataqtigiinnit isigineqarput. Isumaqarpugut innaallagissamik, imermik kiammillu pilersuinerup qulakkeernissaa kiisalu Telep ingerlatsinera pisortat suliassarigaat. Tamatumani nammaqtigiinnissamik tunngavik aallaavigalugu.

Taama oqaaseqaateqarluni isumaliutissiisummilu allassimasutut paasinnilluni siunnersuut ataatsimiititaliap aappasaaniigassanngortippaa.



Naaja Nathanielsen
Siulittaasoq




Niels Thomsen




Kim Kielsen




Akitsinnguaq Olsen



Karl Lyberth



Aqqaluak B. Egede



Knud Fleischer